

INKURU Y'INKORAMUTIMA



GUHEMUKA

DUC AUTHENTIQUE

UGUHEMUKA

Duc Authentique

Copyright 2022 — Duc Authentique

Uburenganzira bwose burabitswe. Ntivyemerewe kugira kopi, gusohora canke gushira ku mbuga ngurukanabumenyi mu mvo zo kugurisha kino gitabo utabiherewe uburenganzira n'umwanditsi Duc Authentique ubwiwe canke uburongozi bwa Duke Stories.

Abagiteguye:

Umwanditsi: Duc Authentique

Umuhinyanyuzi: Duc Authentique

Igifuniko: Duc Authentique

Contacts: Duke Stories (Facebook Page)

+257 71349267 (WhatsApp)

Duc Authentique (Facebook, Instagram, Twitter ...)

duccendrars@gmail.com

Casohowe na Duke Stories

Bujumbura, Burundi

Hamwe na Duc Authentique nyene:

IMBERE YO KUGENDA

RUGIRA IMBARAGA

UBWENGE

UMUSODA

IBIHE

KURE Y'UMUTIMA

INKURU YA MIKE

INYUMA Y'UBUZIMA

IKIGUZI NARISHE

NIZINDI...

Intangamarara

Uguhemuka ni ijambo rivuye mu rivuga guhemuka rishobora gusigurwa mu buryo bubiri. Mu buryo bumwe ni ukudakora ico warukwiye gukora, mu bundi buryo ni ugukora ico utari ukwiye gukora.

Guhemuka ni ico kintu cose ushobora gukorera umuntu nibigarankana kinyuranye n' ico yarakwitezeko kigatuma akomereka akanakaza icizere yaragufitiye.

Nkuko habaho guhemuka rero habaho n'uguhemukirwa.

Guhemuka urabihitamwo ariko guhemukirwa uvyisangamwo kandi vyose bigira ingaruka ari nazo tuzobona murino nkuru.

Iyo uhemukiwe ntuba uhemutse ariko iyo uhemutse uba uhemukiwe kuko uretse uwo uhemukiye nawe ubwawe uba wihemukiye. Mu buzima nta kintu nasanze kigoye nko kwibabarira. Aho ushobora kugira ubuhizi bwo gusaba imbabazi ariko wamara kubabarirwa bikakunanira kwibabarira ukazorinda upfa wumva ijwi rikwagiriza mu mutima.

Kuko ubwonko bw' umuntu si imashini ushobora gufyonza akantu ukaba urafuse ibirimwo ni nkuko udashobora gutegeka ubwonko kwibagira ivyo wakoze.

Iyo duhemuka biroroha cane ariko iyo duhura ningaruka bikatugora kuzakira.

Ino nkuru yanje nshaka ko ikubera icirwa, nshaka ko igira aho ikuvanye n'aho igushikanye kuko ntawumenya ejo. Udahemutse

ushobora guhemukirwa ino nkuru nayo ikazokubera inkoni yo kwishimikiza igihe woba udendebukiwe.

Agace 1

Dutanguriye inkuru ahantu mu cumba kimwe ariko twitegereje neza turabona hasa no mu bitaro aho tubona umugabo aryamye ku gitanda c' abarwayi bigaragara ko arwaye iruhande yiwe hicaye uwundi mugabo adakuze cane aca aramubaza ati: *Scott dis-moi que ce n'est pas vrai!*

Scott aca arazunza umutwe ati: *Malheureusement ni kwo kuri.*

Umugabo ntakindi yakoze yarahagurutse aragenda.

Asohoka ibitaro yugurura i modoka yari iparitse hirya hama arayatsa aragenda. Agenda atavuga ikintu na kimwe arahoze cane gushika igihe yashikiye mu rupangu rumwe araparika hama yinjira mu nzu arangurura no mu cumba arugara n' urufunguruzo hama yicara hasi imbere y' igitanda yegamira ku ruhome atangura kwiyumvira.

Turabona murukwo kwiyumvira harivyo yibutse...

Turabona ahantu hasa no mwishure aho tubona abanyeshure bicaye mu ntebe bambaye uniforme imbere yabo hari umugore bisa ko yoba yari umwigisha wabo aca arabaza ati: *N' ikihe kintu mwiyumvira ubwa mbere iyo mwiyumviye ibijanye no kurongora?*

Umunyeshure umwe aca arakiriza ati: *Kurongora nyene!*

Turabona abanyeshure bose batwengeye rimwe. Maze murukwo gutwenga mwigisha yatoye uwundi munyeshure ati: *Weho wiyumvira iki?*

Nawe aramwishura ati: *Ndakunda abana cane kuburyo atari je nzobona ndarongoye ngo mvyare abana banje...*

Tugaruke kuri wa mugabo.

Turabona ahagaze ku gatebe gato ariko turavye hejuru turabona hari umugozi wirabura uboheye mwizosi ukaca wongera ukabohera hejuru kuri plafond aca atangura kuvugira mu mutima ati: sinigaye gose kubona mfashe ingingo igayitse yo kwiya ubuzima ntihaye. Simbabajwe na gato nuko inkuru y'ubuzima bwanje igiye gushirirwaho akaburungu hano. Simaramajwe n'inkuru ngiye gusiga kandi sintewe ubwoba nibindindiriye inyuma y'ubu buzima. Sinzi neza ko n'urupfu ruri bunyakire kuko nanje ubwanje sinzi ko nokwiyakira. Ubuzima ni ijamba ridafise ico rivuze, urupfu ni inzira niciriye, umutima wanjye watanguye gusha kera ubu ntakindi nshaka atarukwo utongoka.

Ukwo yakavugiye mu mutima yapfunze amaso ariko hatangura kumuzamwo amasanamu y'utwana dutatu twicaye imbere yiwe tumuhanze amaso twijiriye mbere ku matama yatwo hatemba amosozi...hamuzamwo kandi amashusho aho tubona umukobwa muto yaramupfukamye imbere arira cane aboroga ati: *Diouk ndakwinginze mbabariraaa!!!...*

Hariho n'ayandi majwi y'umukobwa yatanguye kwumva yavugaga ati: *Diouk ndagiye kandi ngiye ndagusigiye inkuru ntazi ko ari mbi canke nziza mu matwi yawe ariko menya ko ukuzimu undungitsesemwo vuba uzokunsangamwo kandi nzokwakirana yose...*

Haheze akanya yongeye gukanura aca aravuga ati: *Diouk nta ruhukiro ryiza ndakwipfurije kuko ntaribaho ahubwo kaze mu kuzimu...*

Ukwo yakavuze ayo majambo yatembagaje agatebe yarahagazeko asigara yenena mu kirere aratera amaguru n' amaboko ariko inyuma yakanye gato yatekereje bigaragara ko ivyiwe vyari birangiriye aho.

Turabona ariko hari uwuriko aragenda wenyene mu nzira imanuka cane kandi hepfo har'umwijima mwinshi cane haca humvikana ijwi riti: *Urabona vyukuri ko nokureka ukagenda ukwo nyene? Igihe cawe ntikiragera.*

Ubwo nyene turabona wa mugabo yiyahura aryamye hasi biboneka ko umugozi wacitse aca atangura gukorora cane ubwo nyene hari uwadodoye ku rugi cane aca arahaguruka agenda arakorora cane aca arugurura haca hinjira uwundi mugabo ari calme cane ati: *Diouk Imana yanyeretse ko uriko uragerageza kwiyahura imbwira ngo nze umbwire ivyawe.*

Diouk aho kumwishura yaciye yimyoya ati: *Imana nayo irantera ishavu kuberiki idashobora kundeka?*

Umugabo ati: *Imana iragukunda kurusha nuko wovyibaza kandi ishaka kugukura mwuwo mwiza w' umuzitanya wazimiriyemwo. Irashaka kukugira itara rizomurikira amahanga irashaka kuguhindurira izina n'amateka...*

Turabona haheze akanya bicaye wa Mugabo ati:

“Nitwa Mugenzi weho Imana yambwiye ko witwa Diouk ndashaka rero umbwire neza uko vyagenze.

Maze Diouk aca arihumura mu maso ati: Vyose vyatanguye
igihe...

Agace 2

Diouk aratwiganira ati:

Vyose vyatanguye umusi umwe natashe muhira meze neza cane. Ndavyibuka ico gihe umufuko warumeze neza kuko ikonti yanje yari yatwenze, ukwezi kwicumi na kabiri kwari mu guhera aho ku kazi bari baduhembeye amezi abiri icarimwe hamwe nutundi turusho twinshi batanga mu mpera z' umwaka.

Yaramahera menshi kandi nta mugambi nari ndayafitiye kuko inzu nari narubatse mfise n' imodoka nziza.

Nkiriko ndiyumvira telephone yanje yaratse maze irahinda ndayitora ndaba mu kiyo mbona ni Papa ariko arampamagara.

Nari ndabizi ivyo agomba ambwire kuko buri musu twashwana ukwo ampamagaye tubipfa.

Natanguye kugomba kuyirengagiza ariko birangira ndayifashe ndashira ku gutwi hama ndavuga : *Alloo Papa*

Papa: *Comment ça va mon fils?*

Jewe: *Tout va bien!*

Papa: *Ariko sha nubu ntaco uribwira koko?*

Jewe nshavuye: *Aaarrêtes Papa urazi ko ntabikunda et voilà tu recommence!*

Papa ankankamira : *Tais-toi! Aho utagirira isoni uraduza ijwi aho ntumaramara!*

Jewe: *Ukabandanya ndakupa!*

Papa: *Umva uku kwezi kugahera ataco uribwira umenye ko nzoca ndakuvuma!*

Jewe: *Sawa ramutsa Maman...*

Nca ndakupa.

Numvise nsubiye gushavura nkuko vyakunda kugenda ariko haheze akanya nariyumviye nti: *Harya ngo nsinshaka kurongora...ariko wa mugani niki kimbuza? Ko ataco mbura? Inkumi ziruzuyeee...yewe reka ahubwo niyumvire neza...*

Natanguye gutondesha mu mutwe abakobwa bose twavugana ico gihe mpera kuri Nadia nti: *Nadia n' umukobwa mwiza aciye ubwenge ariko aroroshe cane, umuntu ku ncuro ya mbere aza kundaba yagiriyeko anyiha wese atihagazeko na bukebuke?! Hm ha wapi urya sinomwiteza ndamuzana mu rugo noba ndongoreye igihugu.*

Niyumviye uwundi nawe: *Grace nawe n' umukobwa ashaputse cane avuga amajambo menshi kandi akunda amahera cane, uwo wewe sinirirwa ndamutebako.*

Hama niyumvira: *Gloria vraiment ni dori dori arakwije ibisabwa ariko yaravyaye kandi nta mukobwa yavyaye nozana ngo ndere abo ntavyaye...oooya vraiment...ntivyokundaaa...*

Nakomeje kwiyumvira abakobwa bose abanyirukako, abo nirukako abo twigeranye, ewana binanira kwidecida gushika aho nafashe ikaramu nkabandika kudupapuro ntangura kugira tirage au sort haheze akanya nca ndaduka ndatwenga cane nti: *Hhhhhh sans blagues ntasazee!! Yewegayeweee!!!*

Natanguye kubona ko ata coroshe ariko kandi kubibona ntaco vyanshikanyeko birangira ndabivuyemwo.

Ku musi bwaca ari ku Noël, gusenga ntivyari ibintu vyanje cane ariko kandi bitanse gose naragenda gusenga dimanche muri église iraho nakundira ko haza gusenga abakobwa beza beza gusa mbere hasengera n' abajeune ku buryo ntotinya kuvuga ko atari je jenyene nazanwa n' utwana.

Rero uwo musi ku Noël nariteguye ndambara kuberwa ata kwirarira vyari ibintu vyanje kuko nari maze kubibwirwa kenshi ndateba ndiyakira.

Uwo musi naragiye gusenga nkuko bisanzwe biraryoha vraiment naje ndaryoherwa. Hanyuma haragera umwanya batangura guprésenta indirimbo biboneka ko twari uduspecial.

Niho haza umuhungu n'umukobwa imbere batangura kuririmba.

Nitegereje umukobwa mu buryo ntazi amaso yanka kumuvako, yararirimba nkumva ijwi ryiwe rirongoroye ryisubiramwo mu bwenge bwanje.

Ico gihe niho natanguye kwumva umenga noshimira Imana ko itaremye gusa ahubwo yahinyanyuye! Numva noshima uwo mwanya kuba mfise amaso ashobora kwitegereza kimwe mu vyahinyanyuwe nako mu vyaremwe na Rugira.

Natanguye kwumva ko umutima utera nkaho umenga ryari iryambere uteye. Natanguye kwumva umubiri kuri jewe numva merereje. Natanguye kwumva isengesho mfise ari rimwe, aruko umwanya wohagarara. Natanguye kwumva uburyohe bwo

kubaho...nukuri ivyariko birambako nanje ntimubimbaze ariko ico nibuka nuko vyari biryoshe.

Nubwo buri segonda ryarusha agaciro ifeza n' izahabu, nubwo nari numva ko uwari kumpa amahirwe yo gukabisha ayo masegonda n' imyaka nobayeho ntari guteba kwemera nkenguruka, ariko ntivyakunze kuko akaryoshe ntigahora mw' i tama.

Sinamenye ivyakurikiye kuko nasubiye gukangukwa mbona bose bariko barasohoka nca nibwira ko imisa iheze.

Ntakindi nakoze atari ukuduza ibiganza nkabicisha mu maso kugira nitegereze neza hama nca ndahaguruka ndasohoka.

Nsinari nkabandi basohoka bakaca baguma bahagaze imbere y'isengero baramukanya ariko narangurura muri parking. Rero narasohotse ariko ngeze muri entrée niyumvise nkaho umenga harico nsinze, mu kanya isase umutima utangura gutera cane.

Vyananiye kubandanya binanira kuguma mpagaze umutima umpatira gusubira indani. Mwico gihe novuga ko ubwenge ataco bwariko buramfasha kuko ntakindi nakora uretse gukurikira umutima.

Nisanze ndiko ndazunguruka kwisengero ndondera ico ntatakaje gushika igihe nabonye umuntu ahagaze hirya yambaye ikanzu y'abaririmvyi. Sinamenye igituma ibirenge vyaciye vyongeza umuvuduko mu misogonda make mba ndamuhagaze inyuma umutima usubira gutera kandi hanyuma ukuboko kwanje kuraduga buhorobuhoro ikiganza canje kimukora ku rutugu nza mbona...

Ibice 3

Namukoze ku rutugu buhoro buhoro kuko sinashaka kumuhungabanya ariko kubwamahirwe make namukozeko nsanga yagiye haruwamuhamagaye hirya akoresheje ukuboko nawe aca aragenda bihurirana nanje ndamukozeko ariko ntavyo yitayeho nibaza ko atavyumvise nanje nsigara ngagaye ntanyiganga ukuboko kwagumiye mu kirere haheze akanya ndavye mbona wa mukobwa aragarutse aza aratwenga angana.

Ku mutima (Ohh my God)

Yaranshikiriye ashika ambwira ati: *Salut...*

Nanje ntwengana akamwemwe kadasanzwe mvuga nitonze cane kurusha ukwo nigeze nti: *Saluut!*

Vyaranryoheye ukuntu yaciye avuga amwenyura cane ibintu vyari bimubereye ati: *Bari bambwiye ko mwariko murandondera!*

Natanguye kubaza ubwenge ico ndamuronderera ndakibura haheze akanya nanka kumaramara nti: *Yes nshaka kugusaba service...*

Nawe ati: *Nta kibazo!*

Jewe nti: *Ndashobora kughobera?*

Nza mbona aratwenze cane ntangura kumaramara no kugira ubwoba nibaza nti: *Aha kueli nsindekonye?*

Haheze akanya aca ambwira agitwenga ati: *Hhhh ukimbwira n'ubuseriye bwinshi j'avais l'impression y'ikintu kinini!*

Nza mbona arasanzuye ibiganza ati: *yaaaaambiiii...*

Yari imbere yanje nki metero imwe ariko numva umenga nosubira inyuma nkitaza hama nkamuhobera ndamuteruye ibirenge bidakora hasi maze nkamuzungurukana akabona ijuru ibicu bizunguruka.

Ivyo vyose nivyanciye mu mutwe mu kanya kadakwira n' umusegonda. Natambutse ndegera Uwaremwe yitondewe maze ndambura amaboko yanje ndayacisha mu mbavu hiwe ndayahuriza inyuma kumwumva anyegereye navyumva nkindoto nca ndamwongerera mu gutwi nti: *Kuri jewe si service ntoya kandi si nini ariko n' amahero.*

Haheze akanya numvise akaganza kankubita mu mugongo nza numva aravuze ngo: *Hey ndagusabe service nanje...urashobora kundekura?*

Numvise maramaye nca ndamurekura ndavye mbona koko abantu bose bariko baraturaba nca menya ko nshobora kuba narengeje umwanya wemewe n'amategeko ya yambi nako yo guhoberana.

Nkiriko ndiyumvira ingene ni excuza nza numva aravuze ati: *Jewe ni Lucia nsinzi ko twari tuzinanye?*

Jewe: *wow! Lucia gasonna neza*

Nawe (amwenyura): *Merci*

Jewe: *Euh! Nanje ni Diouk*

Lucia: *oh Diouk enchanté*

Aca ampa ikiganza nanje ndamuha icanje nti: *enchanté*

Aca ambwira ati: *so unyihanganire bibaye ngombwa ko ngenda karibu kandi...*

Aca aragenda nti: *Merci ryariteka kuvugana nawe...*

Ariko yari yamaze kugenda nanje nca ndahindukira ndataha.

Mu vyukuri natashe nibaza ibiriko birambako aho naza numva fone isonye ndavye mbona ni Scott umujama wanje nca nditaba nti: *Yeah man!*

Scott: *Bro ibi bintu mbonye warungitse nibiki?*

Ntangaye nti: *hmm ivyahe ga man?*

Scott: *hahaha oya sha gabanya itabi!*

Jewe nasanze natwenze nti: *hhh ahubwo wewe bagucunge kabisa kubera ndumva uriko urancanganya man!*

Scott: *kandi ga wibaza ngo ni blagues raba whatsapp!*

Aca arakupa nanje numva ngize amatsiko yo kuraba ivyo bintu yariko aravuga nugurura whatsapp nsangamwo message nyinshi kuburyo nakangutswe.

Nuguruye iyitangura nsanga numutype umwe twari muri groupe imwe yagira iti: *Man ako nako uriko urihereza? Duhe izo habari kbsa*

Nca niruka muri group nsanga hariho audio narungitse nca ndayumviriza numva amajwi yacu twe na Lucia sinzi igihe nafyondeye fone nca menya ko koko umutwe nawutaye. Maze ndayifuta hama ndi excuza ko yari just erreur ariko numva maramaye cane.

Nubwo nayifuse abantu ntibashize amakenga baguma bambaza nkababwira ko ata kidasanzwe. Bamwe batanguye kumbwira ko ibiriko birambako ari ibimenyetso bigaragaza ko ndiko ndarurwamwo urwo narwo nta rundi ngo rwari Urukundo.

Numvise ijambo urukundo rirankanga nca mvuga nti: nimba uru arurukundo sinari bwakunde kuva mvuka.

Natanguye kwumva nshaka kumenya urukundo icarico ariko uwo nabaza wese yambwira ibinyuranye uretse ko benshi bambwira ko rutabaho maze jewe nza kwemera ko rubaho aho nagiye kwisanga nakijijwe ntagisiba nimwe makoraniro yabera kuri ya eglise Lucia yaririmbamwo.

Ukwo nikwo twahuye na Lucia gushika turaba abagenzi ukwo imisi yahera nikwo twabana hafi kurusha.

Lucia yarumukobwa naraba nkavuga nti: iyo menya ko mu misi igize ubuzima bwanje harimwo umwe nzohurirako na Lucia simba narabayeho ukwo nabayeho.

Mba narakuze nigengesera nirinda ico ntuma mba umuntu mubi.

Bur' uko namuraba nkaraba ubuzima bwiwe nkabuhuza n' ubwihanje nama mpereza kuri conclusion ya: pour être honnête je ne merite pas une fille comme Lucia. (Kuvyukuri simbereye umukobwa nka Lucia)

Ndibuka isengesho nasenga kenshi ngomba nryame ryama ari: Seigneur protège ma Lucia et fais moi quelque un de bien pour que je puisse la meriter. (Mwami, unzigamire Lucia hama nanje ungire muzima kugira nshobore kuba uwumubereye)

Imana ikora ibitangaza umusi urizina nako umusi uruta iyindi itari mike narisuganiye nzugurutsa ururimi incuro amajana ngorora ijwi ndavuga ijambo rimwe ryorohera inryarya rikagora hafi kunanira intwari.

Ndavyibuka hari ku musi wa kane navyutse nkiyindi misi nja kukazi ariko nkitanguye akazi natanguye kwasamura cane mu nyuma meneka umutwe ndashuha cane. Sinaheruka kurwara grippe ariko uwo musi yaraje imerera nabi kabisa.

Ntayandi mahitamwo nari mfise atari ugutaha. Mu nzira ntaha nandikiye Lucia ndamubwira ko ntashe narwaye grippe nawe ntiyanyishura nca nca kuri pharmacie ngura imiti hama nca ndataha.

Nshitse muhira natoye imfunguruzo ngo nugurure umwango wo muri sallon nsanga umuryango ntiwugaye ndakangukwa ninjiye nsanga agatasi ku meza karimwo icayi. Nkitangaye nza mbona Lucia avuye muri coridor nti: wewe?

Lucia ati: *shhhhhhuuh! We uragwaye reka kurenza induru!*

Anca aramfata anyicariko muntebe ndende ankura ikoti nibirato aca anryamikira umudo aranryamika. Sinamenye igihe yazanye agatambara gakanye anshira mu ruhanga nti: *Izi care naziheruka kuri Maman nkiri uruhinja...*

Lucia: *Kandi wewe ntiwumva hora!*

Nca ndahora nguma nitegereza Uwaremwe yitondewe. Kumuraba gusa vyatuma numva meze neza nkibagira vyose. Nabonye azana ubuki nutundi tuntu ntazi ashira mu cayi arakoroga nakayiko hama atangura kuza aranyweshwa.

Kuvyukuri ico gihe numva ari je munyamahirwe wambere kwisi, natanguye kwibaza ico nahaye Imana kugira intoneshe kurusha abantu bari kwisi. Vyananiye kwigumya nca ndavuga nti: *Assez! Cette fois-ci c'est toi qui vas m'écouter!*(Gezaho! kwiye ncuri niwewe unyumviriza)

Lucia yaciye yicara ku gatabure ampanga amaso ibiganza vyawe bifata udutama twawe tworoshe.

Nanje ndatangura nti: *Lucia!*

Nawe ati: *Sabwe!*

Jewe: *imyaka maze kwino Si nubwo atari ibinjana ariko kandi si ibiri.*

Ndazi ko nshobora kuba nsigaye iyiruta icyo maze canke igihushane. Nagiye henshi mpura na benshi, nabwawe vyinshi mbona vyinshi ariko kurino saha kuruno munota kuruyu musegonda ndetse niri tiyerise ndumva nshaka ikintu kimwe. Ndumva nshaka vyose kubigwiza n' ubusa. Ndumva nshaka kumera nkuwuvutse ubu nyene. Ndumva nshaka kuvukira kwisi mbona wewe wenyene. Ndumva nshaka guhaha ijamba, ijamba rituma umutima wanjye utera, ijamba...itseeeee (narasamuye)

Lucia(mwijwi ryikiniga): *kirah!*

Jewe: *twese nako twempe kuko ni jewe nawe!*

(Aca aramwenyura bukebuke)

Ndabandanye nti: *Lucia ndumva amatwi aguma ambaza ryari azokwumva ijamba ashaka ariko niyihangane ubwenge buhagarike gukora maze umutima uvuge ukuri, ukuri gucishwa*

mu ziko ntigushe, ukuri kutavuga uwukuze ariko kuvuga uwukuzi, ukuri iteka gutsinda ikinyoma. Uti ukwo kuri n'ukuhe iryo jambo nirihe?

Ni NDAGUKUNDA Lucia.

Naravyutse ndicara maze nkora mu mufuko nkuramwo impeta nti: Umwiza yaremwe yitondewe Lucia urashobora kwemera kuba umwamikazi w' umutima wanje ukaganza udahangagwa? Woshobora kwemera kuba akabavu kanje maze tukavyara tukuzukuruza?

Numvise amajambo umenga navuze menshi ndahora nitegura kwumva iriva muri we.

Haheze umwanya ataranyishura nza numva avuze...

Agace 4

Sinzi igituma nari numva ntekanye kandi nzi neza ko inyishu itandukanye niyo nashaka ntari gushobora kuyihanganira. Haheze akanya mbona Lucia azenze amarira mu maso ati: *Hari ikintu ntatahura... (Abanza arasevura)...ukuntu d'un coup h'apparaissa umuntu mu buzima ukamenga nuwarungikanywe ubushobozi bwo kw'activa ingingo zimwe z'umubiri.*

Diouk ntagihe kinini giheze ndakumenye kandi ntabintu vyinshi bikwerekeye nzi ariko ico nzi nikimwe nuko naho hoba mu ndoto ntoshobora kuvuga oya ku cipfuzo cawe.

Sinzi ubuhinga wazananye bwo gukora mu buzima bwanje ibitabashije umuhungu n'umwe, ubu ndiraba nanje nkiyoberwa kuko warampinduye. Nsigaye numva nshaka kuba umugaragu wawe, nshaka kukwegukira, nshaka ko aho uzoba ariho nzoba mbarizwa, nshaka kumarana imyaka nsigaje nawe, Diouk nd'uwawe.

Ukwo nikwo urugendo rw' urukundo rwanje na Lucia rwatanguye. Jewe na Lucia twari dukundanye sivyimbeshere, inyuma y'amezi make twapanze ubugeni bwari bubereye ijisho, nsezerana nawe imbere y' Imana n' isinzi ry' abantu maze dukomerwa amashi menshi ntazopfa nibagiye.

Nkuko bisanzwe inyuma y' umusi mukuru wa benshi hakurikira umusi wa babiri aho atacanezereje nko gusanga Lucia yari yaragumije ibanga gushika kuwo musi ibintu tuzi binanira benshi muriki gihe.

Kuvyukuri iyo nsanga vyaramugoye hakaba hari uwundi yapfunduruye agaseke kari kangenewe ntaco vyari kugabanya ku rukundo nakunda Lucia kuko nanje ntabwo nari nera na bukebuke ariko gusanga yarabaye umuhizi gushika kurwo rugezo vyatumye ndamukunda vyo gupfa niyemeza mu mutima kutazokwigera na rimwe ndamubabaza.

Rya juru rito nahora numva bavuga naribayemwo uko nk' umumalayika sinari nkicibuka kahise.

Ariko nubwo warumunezero mwinshi wagaragarira bose ndetse atawari gukeka ko hari ico wuhungabanya, inyuma y' imyaka itanu ataniyirakoroka hari hasigaye muke gushika igihe twashoreranye turaja kwa muganga w' umugenzi wanje Scott kubaza ikibazo aho gihagaze ariko atubwira ko twese dukomeye arukubandanya dusenga.

Uwo mwanya niho natanguye kubona ko abana batangwa n' Imana atari juste ko umugabo n' umugore baja hamwe gusa.

Ntivyari vyoroshe kuri jewe kuko kubona urugo rwanje rutagira umwana no kwiyumvisha ko bishoboka sinzopfe ndamuronse vyanyurana nindoto zanje.

Ndibuka umusi umwe ku mugoroba nari mvuye gukina basket turi kumwe na Skott niho yagenda arambwira ati: *Mu bisanzwe nta kidasanzwe kirimwo nihamwe nyene bihurirana nivyo ubwenge bwawe bwagiye burakira ukavyishiramwo gushika aho biteba bikaba ukuri.*

Jewe: *Oya Scott reka, we urazi gupfa izina ryawe rikaca rizimangana?*

Scott: *None kuzimangana no kutazimangana bisigura iki? Ko nubundi uvuye kw' isi vyose biba birangiye! Mbega urazi isinzi kwisi ry' abana b' impfumvyi? Abana batawe? Bamwe bari mu marerero abandi mu mabarabara! baripfuza n' umwe mu mamiriyaridi y' abantu bari kuri uno mubumbe yokwemera basi akabiyitirira nk' umuvyeyi ariko ntibabironke, nico gituma nawe utokwidogera Imana ngo ntiguhaye uruvyaro kuko Itangishatse.*

Scott yambwiye ayo majambo numva umutima urasimvye nca ndavuga nti: *hhh barabivuze kuel Imana ntitanga vyose! Ntakuntu yari kumpa umugore w' igitanganza ngo vyijane.*

Imisi yaragiye iyindi iraza, ariko umusi urizina Imana ikora igitangaza kumwaka ugira indwi Lucia agaragaza ibimenyetso vyahavuye vyemezwa na muganga ko yibungenze nti wow amashimwe ku Mana yari menshi.

Ntivyatevye inyuma yigihe cagenywe yibaruka amahasa y' abakobwa.

Umunezero wagarutse mu muryango ndetse tugira n' umusi mukuru.

Igihe kimwe nakiye telephone yari i numero ya Scott ariko nshize ku gutwi numva ijwi ry' umugore wiwe arira ambwira ko Scott yinjiye ibitaro arembye cane.

Nahagurutse niruka nkuwutabaye mu minota mike nari nshitse ku bitaro nsanga koko aryamye atikakaza mbaza umugore wiwe ambwira ko atazi na kimwe ngo abanganga ntibarazana inyishu z' ibipimo.

Ariko haheze akanya numvise ijwi rya Scott nca ndahindukira nti:
Scott! Wabaye iki?

Scott mwijwi ritoyi araba umugore wiwe ati: *Cherie wondeka ico mvugana na Diouk gato?*

Umugore wiwe yarasohotse nca nicara iruhande ya Scott nti:
mbwira ncuti yanje

Scott aratangura ati: *Nakomeje kubihishahisha ariko ubu ntaco nkihishira...Diouk ubu tuvugana mfise cancer cérébral kandi igeze kuri stade terminal aha rero nsigaje umwanya uharuye mw' ubu buzima ariko ico sico gikomeye harikindi nkeneye kukubwira ninamara kukivuga ndizeye umutima wanje ucuruhuka.*

Mu vyukuri ntakintu kigoye kandi gicumitana ku mutima nko kwumva umuntu w'umugenzi wawe mwacanye muri vyinshi ko agomba ave mu buzima.

Natanguye kubona vyose uhereye ingene twahuye na Scott ko twahuriye mu kabare igihe kimwe. Nakomeje kwibuka ariko nibuka ka harikintu yambwiye gikomeye gusumba urupfu numva nkwiye kuyatega.

Scott: *Ubuzima buratangaje Diouk ubona uvuka mu kanya nkako gukubita urugohe ukabona urapfuye! Ubona buca ukabona bwira! Ubona ibiba ukitega ibikurikira ariko muri vyose agaciro kikintu ukibona kigiye. Ndabizi umfata nkincuti mpfampfe somambike yawe! Ariko kwino saha nari nipfuza ko kwoba ukuri ariko siko kuri.*

Jewe natanguye kwumv mbabaye mbere n'amasozi agomba kuza nti: *Scott hora urabizi ko ari we mfise gusa!?*

Sctott aca amera nkuwutwenze haheze akanya aca arikaruma ati:
Diouk burya...

Agace 5

Diouk burya Love na Vicky s'abana bawe...

Jewe nkangutswe nti: *Scott urasaze?*

Scott: *Vyari kuba vyiza iyo mba ndumusazi kuko kukubwira ko nikitse mu kiza nkakuzunguruka nkaryamana n' umugore wawe binteye isoni n' ibimaramare bidasanze...*

Natanguye kwumva ntatahura na kimwe nti: *Sindiko ndumva na kimwe!*

Scott arabandanya ati: *Burya igihe muza kwisuzumisha ngo mumenye ikibazo catuma mutavyara namenye ko ari wewe ufise ikibazo kuko intanga zawe zitari zikwije ubushobozi ariko nakubeshe ko ukomeye kugira nsindakubabaze ariko mu nyuma ntwawe n' ukwipfuzwa umugore wawe kubw' ubwiza bwiwe nivyho nitwaje ndamwumvisha uburyo vyokemura ibibazo mwari mufise kandi ko atavyo uzopfa umenye.*

Lucia yanse imyaka myinshi ariko igihe kiragera aracika intege aremera turaryamana maza atwara amahasa ya Love na Vicky.

Jewe aho nari ndi natanguye kwinyagaza nikora kumubiri ngo ndabe ko ntariko ndarota ariko vyanka ko nikangura nza numva Scott arasubiye ati: *Imbabazi zawe ntazo niteze kuko ntazo nkwiriye na jewe ubwanje nsinzi ko noshobora kwibabarira ariko ko ndakubwiye ukuri ninshake mpfe igihano canje n' iki nyene, ndagusavye ntuzobwire Love na Vicky ko ndi se wabo kuko ntavyo mbereye.*

Gushika ubwo ubwenge bwanje bwanse kwakira ivyo nariko ndumva nca ndamubaza nti: *Scott dis-moi que ce n'est pas vrai?*

Scott aca azunza umutwe ati: *Malheureusement nikwo kuri.*

Nabuze ico ndenzako ubwo nyene mu mutwe nibutse umusi Maman aza kuturamutsa hama akambwira ko abana banje atakantu na kamwe kiwanje bantoyeko ko tudasa na bukebuke nkagira ngo nugukina. Mwuwo mwanya nasohotse ngerageza kwitahuza buri kimwe ndi mu nzira ntaha navuze ku mutima nti: *Mana! Mbwira igituma ibi bimbayeko?*

Ubwo nyene nca nibuka Lyse umukobwa nateye inda niga muri secondaire ariko ndamwihakana nirengagije amaririra yarira nca numva ijwi ryiwe mu mutwe avuga: *Diouk mbabarira ndakwingnze!*

Naramwirengagije gushika nubu sinamenye amaherezo yiwe.

Ubwo nyene nca nibuka Denise yarumukobwa yakuze arimpfuvyi namuhendesheje amahera nahembwe irya mbere nkironse akazi nduhuka nawe turyamanye incuro zitari nke kandi nawenyene yagarutse ambwira ko afise inda yanje kandi ikuze asubira kugaruka ambwira ko nibipimo vyerekanye ko aramahasa uwo musuho yasanze nanaborewe nibuka ko nanamukubise ntitaye ko yibungenze aho iryo joro nyene ryakeye numva inkuru bambwira ko bamusanze yiyahuriye mucumba yabamwo, inkuru yabaje bose kiretse jewe.

Kwuwo mwanya nibutse ambwira ati:

Diouk ndagiye, sinzi ko ngira ndagusigire inkuru nziza canke mbi mu matwi yawe ariko menya ko ukuzimu undungitse mwo vuba uzokunsangamwo nanje nzokwakirana yose.

Nari mu cumba canje aho natanguye kwibaza ingene nashoboye kwibagira ibintu nkivyo vyose. Namenye neza ko ntari umuntu akwiriye kubaho hama mfata ingingo yo kwiyahura ariko n' urupfu rwanyanse. Mugenzi iyi niyo nkuru yanje mbwirira Imana inyice nipfire kuko n' ubundi ndi igipfu.

Turabona Mugenzi afata ku rutugu Diouk ati: *Mwenedata humura! Ivyabaye vyarabaye kugira bizobere icirwa abazokwumva iyi nkuru ariko noneho Imana iguhaye amahirwe ya kabiri ariko avec une condition!*

Diouk ati: *Amahirwe ayahe? Condition iyihe?*

Mugenzi: *Condition nuko ugomba kubabarira Lucia kandi ukemera ko uzorera Love na Vicky nkabana bawe, uravyemera?*

Diouk haheze akanya yiyumvira ati: *Novyanka nitwaje iki jewe ndamurusha ububi?*

Ubwo nyene haheze akanya hinjiye Lucia aza ararira cane ashika apfukama imbere ya Diouk ati: *Mbabarira!*

Ariko Diouk yaciye apfukama nawe ati: *Ahubwo nije wo kugusaba imbabazi.*

Aca aramuhagurutsa barahoberana, bagihoberanye turabona Mugenzi yinjiye afashe agahungu ati: *Diouk urabona uyu muhungu?*

Diouk atangaye ati: *Uwo ni Rukundo umukozi wanjye!*

Mugenzi ati: *Nimuze tugende iwabo harico Imana ishaka kukwereka.*

Baca burira imodoka bafata inzira bayobowe na Rukundo gushika igihe bashikiye ahantu kumuhana umwe barinjira haca haza umudamu umwe kubakira ariko Diouk amubonye arasahuka ati: *Non! Ce n'est pas possible!*

Umudamu nawe aca yiruka asubira inyuma agenda arakoma induru kuburyo abantu bashwabadutse kuraba ikibaye Lucia aca akoma Diouk ati: *Urya mu Maman ninde?*

Diouk ati: *Ni Lyse*

Mugenzi aca aregera Diouk azana ikiganza ca Diouk nica Rukundo arabifatanya ati: *Akira imfura yawe, aya niyo mahirwe ya kabiri Imana iguhaye...*

IHEREZO

Ndagushimiye cane kubona warakurikaranye ino nkuru, n' iteka ridasanzwe kandi ndaciye bugufi imbere yawe ndakubwira nti urumuhizi kandi ur'umuhirwe.

Sinzi ko hatabuze umuhungu canke umukobwa, umugabo canke umugore, ashobora kuba ariko arahemuka mu buryo ubu canke buriya akaba abona ko ari ibisanzwe, abakinisha imitima y' abandi birengagije ko nabo bafise imitima. Diouk akibikora ntiyarazi ibimurindiriye yahemutse mu busore bwiwe abiriha mu busaza bwiwe. Rero menya ko kwisi atacijana, Imana ihora ihoze kandi ikibi canke iciza ukoreye mwisi ucishurirwa ubwa mbere mwisi, utibagiye ko inyuma y' ubu buzima hari urubanza...sukubatera ubwoba ariko ni kugira tubibe urukundo turandure ububegito murakoze.